

2 Corintios

¹ Høøch Pablo hädaa nocy njahby. Jesucristøch tøø xwyiinguexy cooçh ja'a miädia'agy nyajwá'xät. Ja'a Dios jaduñ mänaamb cooçh nyajwá'xät. Ja'a hermano Timoteo, tu'ugwiinmáhñdyhøch je'e xmiøødhity cooçh hädaa nocy njaay. Mijts hädaa nocy nyajnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt.

² Ween mijts ja'a Dios hoyhajt weenhajt xmiø'oy møødä Jesucristo. Dios hajxy nDeedyhajtäm. Jesucristo hajxy nWiindsønajtäm.

³ Tsøgä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä,

⁴ hoy ñebiaty hajxy cu nja jajt cu nja habéjtäm. Paady hajxy jaduñ xjiootcapxmøcpøjcäm, jaduñ hajxy hoy njootcapxmøcpøjtägajtsämd pønjaty häyohmbaatp.

⁵ Hix, nebiä Jesucristo chaaçhpøjquiän, jaanä jaduñ hajxy ndsaaçhpøjcämbä. Y coo ja'a Jesucristo hajxy nmøødhijtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm.

⁶ Coo højts ndsaaçhpøcy, mänit højts Dios xjiootcapxmøcpøcy. Y jaduñ mijts njootcapxmøcpøjtägajtspä. Y jaduñ mijts Diosmädia'agy nyajwiingapxø'øwät neby hajxy

jaduhñ mnähwá'adsät. Coó mijts mdsaačhpøjpät neby højts ndsaačhpøquiän, mänit mijts njootcapxmøcpøgät neby hajxy jaduhñ hoy mmee'xtúgät.

⁷ Nnajuøøby højts coó mijts mmee'xtuga'añ, coó mijts Dios xjiootcapxmøcpøga'añ, hoy miäduhñtiä mijts cu mja tsaachpøc neby højts ndsaačhpøquiän. Nmøød højts ja'a tøyhajt jaduhñ.

⁸ Mägu'ughajpädøjc, chojpy højts njoot coó hajxy mnajuø'øwät nebiaty højts jim ndsaačhpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaanč tehñ jiootmayhajp højts hänäjty. Høxtä mänaañ højts jaduhñ coó ndijy højts hänäjty jim nho'oga'añ,

⁹ coó ndijy häna'c hänäjty tøø quiojyquiapxytiüñ coó højts hänäjty xyagho'oga'añ. Paady højts jaduhñ njajty nhabejty, jaduhñ højts nnajuø'øwät coó jagooyyä Dios xñäwá'anät, cab højts hamdsoo hoy nniñäwa'anøøjät. Haa ca'a, Dios jaduhñ yagju-jypiøjtägajtsp ja'a tøø yhö'oguiäbä.

¹⁰ Xñäwaan højts ja'a Dios coó højts häna'c hänäjty jim xjia yagho'oga'añ. Homiänaajä højts jaduhñ xñäwa'ana'añ. Nmøød højts ja'a tøyhajt jaduhñ.

¹¹ Naxy mijts ja'a Dios mdehm pia'yá'axät maa højtscøxpän. Jaduhñ højts mijts hoy xpiuhbédät. Coó jäya'ayhajxy nämay Dyiospa'yá'axät maa højtscøxpän, mänit højts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ “Dioscujú'uyäp”, je'eguiøxpä coó højts Dios hoyhajt weenhajt xmio'oy.

¹² Jootcujc højts nnijiäwø'øyii coó højts hoy tøø njäya'ayhaty maa mijtsän hädaa yaabä

naaxwiin. Dios højts jaduhñ xpiädaac coo højts hoy njäya'ayhádät. Jaaya'ay højts xyhijxp coo højts hoy njaançh jäya'ayhaty. Xpiuhbejp højts jaduhñ neby højts hoy njaac jäya'ayhádät. Cab højts hamdsoo hoy nhojiäya'ayhádät.

¹³⁻¹⁴ Hix, howyiinjuøøñä mijts tøø nnäjaayø'øy, caj chipjatiä. Caj mijts mänaa tøø nwiinhøøñ. Tøø højts nmädia'agy hajxy siémpräm xwyiinjuøøyyä. Chojpy højts njoot coo hajxy ca'xy mwiinjuø'øwät, jaduhñ hajxy mxoondá'agät maa højtsçøxpän coo ja'a Jesucristo hänajty quiädaactägatsa'añ. Je'e hajxy nWiindsønñhajtäm. Mänit højts nxoondá'agaambä maa mijtsçøxpän.

¹⁵ Nmøødhøch tøyhajt jaduhñ coo højts nmädia'agy hajxy ca'xy xwyiinjuø'øwaanä, páadyhøch hijty tøø nja wiinmay coo mijts jadähooc nøcxy cu nguhijxy. Jaduhñ hajxy jadähooc cu nxoondáacäm nägøxiä.

¹⁶ Hix, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooçh hijty nwiimbidaannä Macedonia, mänit mijts hijty jadähooc ndu'uguhixáangombä cooçh hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty.

¹⁷ Pero cabä Dios jaduhñ miänaañ cooçh jim cu nminøøyy maa mijtsän. Ca'a yhamdsoojóotøch jim tøø nga'a naxø'øy. Cab jaduhñ yhoyyä coo hajxy mmäná'anät cóogøch tyijy jaduhñ ndu'ugcapxy nmetscapxy, cooçh jim tøø nga'a naxø'øy. Ja'a häna'c-hajxy ca'a mæbøjpä, je'eds hajxy tu'ugcapxp metscapxp, ca'a yhøøchä.

18 Dios hõjts xyhijxp coo hõjts nga'a hõhnda'agy. Cab hõjts mijts mänaa tøø nmøødtu'ugcapxy tøø nmøødmetscapxy.

19 Hix, ja'a Jesucristo, ja'a Dioshuung, cab je'eduhñ mänaa tiu'ugcapxy mietscapxy. Homiänaajä tiømiädia'agy. Y coo hõjts mijts nyajwiingapxøøyy ja'a Jesucristocøxpä, paady hõjts nga'a tu'ugcapxy nga'a metscapxy, ni høøch Pablo, ni hermano Silvano, ni hermano Timoteo.

20 Waambatiä Dios jecy miänaañ coo hånajty yajtøjiada'añ, cøjx jaduhñ tiøjiaty ja'a Jesucristocøxpä. Y coo hõjts ja'a mädia'agy nmäbøjcäm ja'a Jesucristocøxpä, jaduhñä Dios møj jaançh nbädäcäm.

21 Pero ja'a Dios hajxy xpiuhbéjtäm nebiä Jesucristo hajxy jaduhñ nmøødhjätäm tu'ugmädia'agy tehngajnä, møød hõjts møød mijts nägøxiä. Jaanä Dios hõjts jaduhñ xwiinguejxpä coo hõjts ja'a miädia'agy nyajwá'xät.

22 Xyaghijp hõjts ja'a Dios quiø'øjooty ja'a yhEspírituhaam. Xyhuunghajp hõjts jaduhñ. Xmióoyyäm ja'a tøyhajt hajxy jaduhñ coo hajxy homiänaajä xcwieendähadäänäm.

23 Dios ja'a tøyhajt møød cooçh nga'a hõhnda'agy. Páadyhöch jim tøø nga'a naxø'øy Corinto maa mijsän, cábøch njoot hånajty chocy coo mijts nhójt.

24 Pero cab hõjts mijts nhane'ema'añ nebiatiä Diosmädia'agy hajxy mmäbøgät. Hix, nna-juøøby hõjts jaduhñ coo hajxy hamuumdu'joot mmäböcy. Nja wi'i piuhbedaamby hõjts mijts jaduhñ nebiä Diosmädia'agy hajxy maas hoy mbanøcxät. Jaduhñ hajxy maas jootcujc mhídät.

2

1 Mänäajøch jim̄ nhuug hoobiän maa mijtsän, mänítøch mijts nhojy je'eguiøxpä coo hajxy hänäjty hoy mga'a tuñ. Jootmayhájtäbøch jim̄ nwiimbijty. Hoorä, tøøch nmädoyhájcombä coo hajxy hoy mga'a túungombä. Tøøch nwiinmahñdyhaty cooçh jim̄ nga'a tsoj nõcxtägatsa'añ maa mijtsän, coo mijts jim̄ nnä'ä hojtägátsät.

2 Hix, coo mijts nhojtägátsät, mänítøch jadähooc njootmayhada'añ. Pero chójpjøch njoot jaduhñ coo hajxy hoy mdúnät. Jadúhñhøch jootcujc nhídät.

3-4 Mänäajøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtshixó'øwät. Jaanç tehñ jootmayhájpøch hänäjty coo ja'a Diosmädia'agy hajxy hänäjty hoy mga'a panøcxy. Høxtä jóøyyhøch jaduhñ. Paady mijts jaduhñ nmägapxy nhane'emy nocyhaam, njaanç tehñ chojpy mijts jaduhñ. Cábøch njoot chocy coo hajxy mjootmayhadät. Coo ja'a mhaxøøgcuhdujt hajxy mnajtshixó'øwät nébiøch cham̄ nmägapxy nhane'emiän nocyhaam, mänítøch jim̄ jootcujc nnøcxa'añ maa mijtsän. Coo mijts ja'a Diosmädia'agy hoy cu mbanøcxy, cábøch jaduhñ mänaa cu njootmayhajty. Nnajuøøbiøch jaduhñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduhñ hoy mbanøcxät, jaduhñ hajxy nägøxiä jootcujc nhíjtämd, møød høøch møød mijts.

5 Ja'a mijts mmägu'ughajpä ja'a tøø quiädiéeyäbä, nägøxiä hajxy jaduhñ tøø xñägädieeyøøyyäm, ca'a yhøøchähajtiä nidiuhñ.

Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ.

⁶ Hoorä, tøø ja'a mmägu'ughajpähajxy chaačhpøcy. Tu'ugwiinmahñdy hajxy mnibiaatä, paadiä mmägu'ughajpä hajxy myajcumädooyy. Hoorä, tøø jaduhñ chaačhpøjnä.

⁷ Hahixøøby hajxy jaduhñ mmämée'xnät. Jaduhñ hoy jiootcugøøguiumbät, y cab jaduhñ hanaxiä jiootmayhädät.

⁸ Coo hajxy jaduhñ mmämée'xnät, myajcøxø'øgaamby hajxy jaduhñ coo hajxy mjaanč tehñ chocy.

⁹ Paady mijts jayøbajt nnäjaayøøyy, nhijxma-jts mijts jaduhñ pø tøyhájthøch nmädia'agy hajxy hänäjty xmiäbøgaanä hamuumdu'joot.

¹⁰ Pønjaty mijts mmämee'xyp, jaanä jadúhñhøch nmämee'xaambä. Haa ca'a, pø tøøch hana'c nmämee'xy, páadyhøch tøø nmämee'xy, jaduhñ mijts jootcuyc mhídät. Jesucristøch jaduhñ xyhijxp cooçh nga'a hønñda'agy.

¹¹ Coo hajxy jaduhñ nnimiämée'xämd, cabä møjcu'ugong miäjädá'agät maa højtscøxphátäm. Nnajuøøyyäm hajxy coo ja'a møjcu'ugong jiaanč tehñ miäwiinhøøñ.

¹² Cooçh jimñ nmejch maa ja'a cajpt jaduhñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooçh jimñ ndägó'øwät Diosmädia'agy-yajwa'xpä.

¹³ Pero cooçhä hermano Tito jimñ nga'a paaty maa ja'a hermanodøjc-hajxiän, mänítøch ndägøøyy jiootmayhajpä. Mänítøch nwiimbijnä. Mänítøch nnøcxy maa ja'a naax jaduhñ xiøhatiän

Macedonia.

¹⁴ Dioscujú'uyäp ja'a Dios coo hõjts xpiuhbety, coo hõjts xyaghity tu'ugmädia'agy mõõdä Jesucristo. Jadhun hõjts ja'a Dios xpiuhbety coo hõjts ja'a mõjcu'ugong nga'a yajmäjäda'agy majaty hõjts ja'a Diosmädia'agy nyajwa'xy ja'a Jesucristocõxpä. Homiädoonä ja'a jäya'ayhajxy miädoy nebiaty hõjts nyajwiingapxø'øy.

¹⁵⁻¹⁶ Xquiumaaby hõjts ja'a Dios coo hõjts ja'a miädia'agy nyajwa'xä ja'a Jesucristocõxpä. Põnjaty hoy mädoob, põnjaty mäbõjp, je'eds nähwa'adsaamb. Jugyhadaamb hajxy je'eduhñ cõjxta'axiøø nebiä Dios jiugyhatiän. Pero põnjaty hoy ca'a mädoob, põnjaty ca'a mäbõjp, cab hajxy jadhun ñähwa'adsa'añ. Je'eds hajxy haxøøgtuum nõcxy miähmø'øwa'añ. Caj põñ yhamdsoo jada'añ Diosmädia'agy-yajwa'x.

¹⁷ Hõjts mäbõcypiä njajpy je'eguiõxpä coo hõjts ja'a Dios xwyiinguejxy. Hamuumdu'joot hõjts nduñ je'eguiõxpä coo hõjts ja'a Jesucristo tu'ugmädia'agy nmøødhity. Xyhijxp hõjts ja'a Dios jadhun coo hõjts hoy nduñ. Jii häna'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyl'i miädiaacy, je'eguiõxpä coo hajxy jia wyl'i quiänaarhada'añ. Hõjts, cab hõjts jadhun nbahixy.

3

¹ Cab hajxy mmäná'anät coo tyijy hõjts nniguiumayii nebiä häna'c ñiguiumayijän, ja'a yhamdsoo mädia'agy hajxy miäwädiipiä. Coo hajxy hänajty maa ñõcxa'añ, mänitä hermanodõjc hajxy ñäma'ay coo nocy hajxy jadhun ween yhädiuunäxä cooc

tyijy ja'a Diosmädia'agy hajxy hoy tøø yajwa'xy. Pero højts, cab højts jaduhmbä nocy nyajmaajiaty, ni coo mijts nyaghíxät, ni coo mijts xmió'owät.

² Hoy piønä ñajuø'øy coo højts ja'a Diosmädia'agy hoy nyajwa'xy. Haa ca'a, tøø ja'a Diosmädia'agy hajxy mmäbøcy mänaa højts jim hoy nyajnähixø'øyän. Hix, njaançh tehñ chojpy højts mijts hamuumdu'joot. Homiänaajä højts mijts njahmiejtsta'agy.

³ Coø ja'a Diosmädia'agy hajxy tøø mmäbøcy, jaduhnä cu'ug ja'a tøyhajt hajxy miøødä coo højts ja'a Jesucristo jaduhñ xwyiinguejxy maa mi-jtscøxpän, coo højts mijts ja'a Diosmädia'agy nya-jwiingapxó'owät. Jujcy ja'a Dios. YhEspirituhaam ja'a Dios hajxy xyajmäbøjcy. Jaduhñ miäbaady coo ja'a Jesucristo tøø yuugjaay maa ja'a jäya'ay quiorazoncøxphajxiän. Cab jaduhñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tun xiøhatiän Sinaí.

⁴ Paady højts jaduhñ nmäna'añ, nmøød højts ja'a tøyhajt coo højts ja'a Jesucristo xwyiinguejxy.

⁵ Pero cab højts tii njada'añ hamdsoo. Dios højts jaduhñ xpiuhbejp coo højts njädät.

⁶ Jaaya'ay højts jaduhñ tøø xyajnähdijy coo højts ja'a hawiinjemybiä mädia'agy nyajwá'xät ja'a Jesucristocøxpä. Hädaa hawiinjemybiä mädia'agy, yhEspirituhaam højts ja'a Dios tøø xmió'oy. Cabä Dios tøø jiahñä tsaagøxp nebiä jecyquiuhdujt jecy jiahyyän tsaagøxp. Yø'ø jecyquiuhdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawi-injemymiädia'agy hajxy mmäbøgät, mänitä Dios

hajxy xyagjugyhádät cøjxta'axiøø yhEspírituhaam neby je'e jiugyhatiän.

⁷ Hoorä, coo ja'a Dios ja'a jecyquiuhdujt jiahy tsaagøxp, høxtä haamb høxtä tsämaamb ja'a Moisés ja'a wyiin jiøjp hånajty, høxtä cabä israelita ja'a Moisés ja'a wyiin jiøjp hajxy hånajty hoy yheebaanä. Pero paquiä ja'a Moisés ja'a wyiin jiøjp jadhñ ñä'ä haañ ñä'ä tsämaamy. Paadiä Moisés ja'a wyiin jiøjp hånajty yhañ chämaamy, tøø ja'a Moisés hånajty yhoy jim Dioswiinduum maa ja'a Dios hånajty tøø quiäda'aguiän jim tungøxp. Y møcmäjaa ja'a Dios jiaançh tehñ miøød. Hoorä, yø'ø jecyquiuhdujt, cab jadhñ pøn hoy quiudiuna'añ, paady hijty pøn quia'a pädsøma'añ haxøøgtuum.

⁸⁻⁹ Hoorä, coo ja'a Dios ja'a Moisés ja'a wyiin jiøjp jecy yaghaanä yajtsämaamä, jadhñä Dios yajcähxø'cy coo møcmäjaa miøødä. Y coo ja'a Dios ja'a hawiinjemyiädia'agy tøø yejnä coo hajxy tøø xpiädáacäm hawa'adstuum, ja'a yhEspírituhaam ja'a Dios ja'a hawiinjemyiädia'agy tøø yecy. Jadhñä Dios maas hoy tøø yajcähxø'øgy coo møcmäjaa miøødä. Hix, hoy-yagjuøøñä ja'a Moisés ja'a wyiin jiøjp jecy yhaañ chämaamy. Maas hanaxiä ja'a hawiinjemyiädia'agy yhoy-yagjuøøñä, ja'a højts nyajwa'xypä.

¹⁰⁻¹¹ Jadhñ quiähxø'øgy coo ja'a jecyquiuhdujt jadhñ quia'a jaty tsoobaatnä. Ja'a hawiinjemyiädia'agy ja'a Jesucristocøxpä, je'eds jadhñ tsoobáatnäp. Y cab jadhñ mänaa tiägoyya'añ.

¹² Tøyhajt jadhñ, paady højts nga'a tsähdiuñ mänaa højts ja'a Diosmädia'agy nyajwa'xiän, ni nga'a mädsähdiuñii højts jadhñ.

13 Hix, haamb tsämaambä Moisés ja'a wyiin jiojp hänäjty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøoyy. Coo ja'a Moisés miädiaacpädøoyy, mänitä wit ñiyajwiinguwidsøoyy, je'eguiøxpä coo ja'a wyiin jiojp hänäjty jejcy quia'a hanaannä quia'a tsämamaannä. Paady jaduhñ miädsähdiuunä. Hix, yhixaambiä israelita ja'a Moisés hajxy hänäjty coo ja'a Moisés ja'a wyiin jiojp hänäjty quia'a haannä quia'a tsämaamnä.

14-16 Pero ja'a israelitahajxy, jaančh tehñ quiuhxex hajxy hänäjty, cab hajxy hänäjty miädia'agywyiinjuø'øy. Høxtä chamnäbaadyñä hajxy jaduhñ quiuhxexä. Coo ja'a jecyquiuhdujt hajxy mänaa miädoy, cab hajxy jaduhñ wyiinjuø'øy, ja'a Moisés jecy miädiäacäbä. Mänit hajxy jaduhñ wyiinjuø'øwät coo hajxy hänäjty tøø miäbøcy hamuumdu'joot ja'a Jesucristocøxpä. Je'e hajxy nWiindsønähjätäm.

17 Hoorä, tu'ugjuøhñdy ja'a Jesucristo yhity møødä Tieediä yhEspíritu. Y coo hajxy nmäbøjcäm ja'a Jesucristocøxpä, jaduhñä cuhdujt hajxy xmióoyyäm coo Dios hajxy nba'yáaxämd.

18 Hoorä, pønjaty jaduhñ hamuumdu'joot mäbøjp ja'a Jesucristocøxpä, tøø hajxy ngøxy wiinjuøøyyäm coo ja'a Jesucristo miøjjä jiaančhä. Tehngajnä ja'a Jesucristo hajxy xyaghaguipxyjatiøøyyäm neby je'e yhitiän. Hix, tu'ugjuøhñdy je'e yhity møødä Tieediä yhEspíritu.

4

1 Hojioot ja'a Dios jiaančh tehñ miøød, paady højts tøø xwyiinguexy coo højts ja'a miädia'agy

nyajwá'xät ja'a Jesucristocøxpä. Paady højts nga'a jootmayhaty ni mänaa.

² Nyejpy højts ja'a tøyhajt coo højts ja'a Diosmädia'agy nyajwa'xy. Cab højts jaduhñ mänaa nhøhnda'agy. Ñajuøøbiä cu'ughajxy jaduhñ coo højts mänaa nga'a nhøhnda'agy. Xyhijxp højts ja'a Dios jaduhñ. Ja'a häna'c-hajxy høhndaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduhñ yajmämädiaagøøby magämaa. Hoçhähdiiuunnä hajxy jaduhñ jiatcø'øy. Pero højts, ja'a tøyhajt højts nmädiaacyy.

³ Cabä jäya'ay ja'a mädia'agy hajxy nägøxiä wyi-injuø'øy, ja'a højts jaduhñ nyajwa'xypä ja'a Jesucristocøxpä. Paady hajxy jaduhñ quia'a wiinjuø'øy coo hajxy haxøøgtuum wiädity.

⁴ Paadiä Diosmädia'agy hajxy quia'a mæbøga'añ, tøø ja'a wyiinmahñdyhajxy piädäacäxä haxøøgtuum ja'a møjcu'ugóngäm, ja'a yaa hanehm̄bä hädaa yaabä naaxwiin. Coo ja'a wyiinmahñdyhajxy tøø piädäacäxä haxøøgtuum, paadiä Diosmädia'agy hajxy hoy quia'a wiinjuø'øwa'añ maa jaduhñ myiñän cujaay coo ja'a Jesucristo møcmäjaa miøødä. Tu'ugmädia'agy ja'a Jesucristo yhity møødä Tieedy.

⁵ Coo højts ja'a Diosmädia'agy nyajwa'xy, ja'a Jesucristo højts nmädiaacyy coo hajxy nägøxiä nWiindsønñhajtäm. Cab højts jaduhñ nyajcumaya'añ. Jaduhñ højts njoot chocy coo højts mijts nbuhbédät, je'eguiøxpä coo højts ja'a Jesucristo nWiindsønñhaty.

⁶ Dios jecy mänaan coo jøøñ jiäjät hagoodstuum. Cahnä ja'a naaxwiimbä hänajty yhoyø'øy. Jaaya'ay

højts ja'a miädia'agy jaduñ tøø xyajwiinjuø'y coo je'e møcmäjaa miøødä. Coo ja'a Jesucristo hajxy tøø xyajnäähwaats tøø xyajcuhwáatsäm, jaduñ hajxy nyajnajuøøyyäm coo ja'a Dios møcmäjaa miøødä.

⁷ Jaaya'ay højts tøø xwyiinguexy coo højts ja'a miädia'agy nyajwá'xät ja'a Jesucristocøxpä. Jaanç tehñ choobaatp ja'a miädia'agy jaduñ. Højts, cab højts møcmäjaa nhamdsoo møødä. Dios højts jaduñ xpiuhbejp coo højts ja'a miädia'agy nyajwá'xät. Coo højts jaduñ xpiuhbety, jaduñ yajnajuø'y coo ja'a Dios møcmäjaa jiaanç tehñ miøødä.

⁸ Tøø højts häyohn may nmänaxy nyajnaxy, pero cab jaduñ tiehñ yhanaxiä. Naxy højts nga'a najuø'y neby højts njatcø'øwät, pero cab højts hanaxiä njootmayhaty.

⁹ Tøø højts häna'c mayhooc xjia wi'i chaachtuina'añ, pero cab højts ja'a Dios mänaa xñajtshixø'y. Hoy højts häna'c mayhooc tøø xjia häyoowhixy, cab højts nmøjppäda'agy. Hix, homiänaajä højts ja'a Dios jaduñ xcwieendähaty.

¹⁰⁻¹¹ Nebiä Jesucristo hijty mäjähñdium wiäditiän jabom-jabom, jaanä jaduñ højts mäjähñdium nwädijpä homiänaajä. Ja'a Jesucristocøxpä højts häna'c xjia wi'i yagho'oga'añ. Pero cab højts Jesucristo xñä'ägä nähducy. Hix, coo ja'a Jesucristo yho'cy, mänit jiuypijøjtägajch. Mänit jim ñøcxy maa ja'a Tieediä wyiinduumän. Jimä møcmäjaa jäda'ahaty miøødänä. Paady højts jaduñ homiänaajä xcwieendähaty.

¹² Paady højts mäjähñdium nwädity coo højts Diosmädia'agy nyajwa'xy. Coo ja'a Jesucristo

jiugyhaty, paady hajxy xcwieendähájtäm homiänaajä.

¹³ Jaduhñ jim myiñ cujaay maa ja'a Diosmädia'aguiän coo tu'jäya'ay jecy miänaañ: “Nmäbójpíøch ja'a Diosmädia'agy, páadyhöch ja'a Dios ngapxpaady”; jaanä jaduhñ hõjts ja'a Diosmädia'agy nmäbõjpä, paady hõjts ja'a Dios ngapxpaatpä.

¹⁴ Coo ja'a Dios ja'a Jesucristo yagjujypiøjtägajch, ja'a nWiindsøñhájäm, jaduhñ hõjts ja'a tøyhajt nmøødä coo hõjts xyagjujypiøjtägatsaambä näguipxy møød mijts. Paadiä Dios hajxy xyagjujypiøjtägatsaanäm coo hajxy nhíjtäm tu'ugmädia'agy møødä Jesucristo. Mänitä Dios hajxy nägøxiä xyajnøcxäänäm jim maa ja'a wyiinduumän näguipxy møød mijts.

¹⁵ Paady hõjts häyohn nmänäxy nyajnaxy, chojpy hõjts njoot jaduhñ coo mijts ja'a Diosmädia'agy hamuumdu'joot mmäbõgät cooc ja'a Jesucristo hajxy tøø xñähho'túutäm. Jaanä jaduhñ hõjts njoot chojpä coo ja'a jäya'ayhajxy maas nämay jiaac mäbõgät, weenä Dios hajxy nämay ñäma'ay: “Dioscujú'uyäp”, je'eguiøxpä coo ja'a Dios hojioot jiaanç tehñ miøødä. Y weenä Dios hajxy nämay ñämaabiä coo møcmäjaa jiaanç tehñ miøødä.

¹⁶ Nnajuøøby hõjts jaduhñ coo ja'a Dios hajxy xyagjujypiøgäänäm, paady hõjts nga'a jootmay-haty. Tehngajnä hõjts ja'a Dios møcmäjaa xjiaac mo'oy maa hõjts njuøhñdycøxpän, hoy hõjts nni'x ngopc tehngajnä jia mäjay.

¹⁷ Neby hõjts häyohn yaa nmänäxy nyajnaxiän, cab hõjts jecy nmänäx nyajnaxa'añ. Y cab hõjts

jaduhñ njaty tsaachpøcy. Coo højts jaduhñ tøø njaty tøø nhabety, paadiä Dios ja'a mayhajt møj may tiuna'añ maa højtscøxpän cøjxta'axiøø.

¹⁸ Pero cab højts jaduhñ nmøjpäda'agy coo højts jaduhñ yaa njaty nhabety hädaa yaabä naaxwiin. Hix, paquiä højts nnä'ä jaty nnä'ä habety. Jim højts njoot nbäda'agy maa ja'a Dios ja'a wyiinduumän. Cøjxta'axiøø hajxy jim xyaghidáañäm.

5

¹ Tsipcøxp hajxy nho'ogáañäm ndägoyyáañäm. Pero nmøødhájtäm ja'a tøyhajt hajxy jaduhñ coo ja'a Dios hajxy tøø xyajnáhdíjjäm cooc hajxy jim xyaghidáañäm maa ja'a wyiinduumän cøjxta'axiøø. Diósäts hajxy jim xyaghidáañäm, ca'a wyiingjäya'ayä hajxy jim xyaghidáañäm.

² Coo hajxy yaa ndsaačhpøjcäm hädaa yaabä naaxwiin, paadiä njoot hajxy jaduhñ tøø nbädáacäm coo hajxy jim nnøcxáañäm tsajpootyp.

³ Coo hajxy jim ngóo'tämd, jaanč tehñ jiootcujc hajxy jim nnijiäwø'øwáañäm jim Dioswiinduum.

⁴ Mäduhñtiä hajxy yaa njaac híjtäm hädaa yaabä naaxwiin, cab hajxy jootcujc nhíjtäm je'eguiøxpä coo hajxy yaa ndsaačhpøjcäm. Pero cab hajxy ndsójcäm coo hajxy paquiä nho'c ndägóoyyämd. Je'e hajxy ndsójcäm coo njugyhájtämd cøjxta'axiøø nebiä Dios jiugyhatiän.

⁵ Ja'a Diósäts hajxy jaduhñ xyajnáhdíjjäm coo hajxy jim xyajnøcxáañäm maa ja'a wyiinduumän. Tøø ja'a yhEspíritu hajxy jaduhñ xyajnáguéjxäm coo hajxy jaduhñ xmiøødhíjtämd tu'ugmucy. Jaduhñä tøyhajt hajxy nmøødhájtäm coo ja'a

Dios hajxy tøyhajt xjiaančh yagjugyhadaänäm cøjxta'axiøø neby je'e jiugyhatiän.

⁶ Paady højts jootcujc nhity jabom-jabom. Mäduhñtiä højts yaa njaac jugyhaty hädaa yaabä naaxwiin, cab højts jim ndsoj nøcxa'añ maa ja'a Jesucristo wyiinduumän. Tøyhajt jaduñ.

⁷ Hoy højts ja'a Jesucristo yaa nga'a ja hixy hajujcy, nmäbøjcäp højts ja'a miädia'agy jaduñ.

⁸ Cab højts nnä'ägä jootmayhaty ni weeñtiä. Chojpy højts ja'a njoot coo højts nhó'ogät, coo højts jim nnøcxät maa ja'a Jesucristo wyiinduumän.

⁹ Cab højts nmøjpäda'agy pø ho'ogaamb højts, ó pø cab højts ndsoj ho'oga'añ. Pero chojpy højts njoot jaduñ coo højts ja'a Jesucristo miädia'agy hoy ngudiúuñät. Jaduñ højts ja'a Jesucristo xquiumáyät.

¹⁰ Hix, nägøxiä ja'a Jesucristo hajxy nøcxy nwiindäna'awáänäm. Mänit jaaya'ay ñägäpaxa'añ pøn hänäjty hoy tøø quiudiuñ, pøn hänäjty hoy tøø quia'a cudiuñ. Pønjaty hänäjty hoy tøø quiudiuñ, je'eds ja'a hoyhajt ja'a weenhajt hajxy paadaamb. Pero pønjaty hänäjty hoy tøø quia'a cudiuñ, quiumädownamb by hajxy je'e.

¹¹ Nwiingudsähgøøby højts ja'a Jesucristo. Jia wi'i chojpy højts ja'a njoot jaduñ coo højts xquiumáyät. Nja wi'i yajmäbøgaamb by højts ja'a cu'ughajxy coo højts ja'a Jesucristo tøyhajt tøø xwyiinguexy. Ñajuøøbiä Dios coo højts ja'a miädia'agy hamuumdu'joot ngudiuuñä. Chójpjæchä njoot jaduñ coo mijts mnajuøøbiät coo højts ja'a Diosmädia'agy hamuumdu'joot ngudiuñ.

12 Cab hõjts nyajcumaya'añ, hoy hõjts jaduñ nja niñänømyii coo hõjts ja'a Jesucristo tøø xwyi-inguexy. Paady hõjts mijts jaduñ nhawáañäm, jaduñ mijts mnajuó'owät neby hõjts mijts xpi-uhgapxó'owät coo hõjts häna'c hñajty jaduñ tøø xñähwaambety. Ja'a häna'c-hajxy jaduñbä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'y coo ja'a wyiinmahñdyhajxy quia'a nä'ägädä hoyyá.

13 Jaduñ hõjts häna'c xñänømy cooc tyijy hõjts nguhmäñø'y coo hõjts ja'a Dios ndsocy. Diósäts hõjts xñajuøøby coo hõjts nga'a cuhhiñ coo hõjts nga'a cuhmäñø'y. Hix, chojpy hõjts ja'a njoot jaduñ coo mijts ja'a Dios ja'a hoyhajt ja'a weenhajt xmió'owät.

14 Coo hõjts ja'a Jesucristo xjiaanč tehñ chójcäm, paady hõjts ja'a miädia'agy ngudiúunäm hamuumdu'joot. Nmøødhajtäm ja'a tøyhajt hajxy jaduñ coo jaaya'ay hajxy hoy xñähho'túutäm nägøxiä. Xyajñähwáatsäm ja'a nbojpä ngädieyhajtämhajxy.

15 Coo ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsögä miädia'agy hajxy jaduñ cudiúunäm mäduhñtiä hajxy yaa njaac jugyhajtäm. Y coo ja'a Jesucristo jiuypijøjtägajch, jaduñnä tøyhajt hajxy nmøødhajtäm coo hajxy xyagjugyhadäänäm cøjxta'axiøø nebiä Tieedy jiugyhatiän.

16 Cab hõjts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduñ hõjts hijty nhixy nebiä pajäya'ayän. Pero cab hõjts jaduñ

nhijxnä nebiä pajäya'ayän.

17 Hoorä, pønjaty ja'a Jesucristo tu'ugjoot tu'ugjuøhñdy møødhjñäp, hawiinjembjä wiinmahñdy hajxy jaduhñ miøødhjñäp. Tøø ja'a yhaxøøgwiinmahñdy hajxy jaduhñ yhøxhijxnä.

18-19 Ja'a Dios jaduhñ mänaañ coo hawiinjembjä wiinmahñdy hajxy nmøødhjñäp. Y coo ja'a Jesucristo hajxy hoy xñähho'túutäm, jaduhñä Dios ja'a nbojpä ngädieey hajxy xyajñähwáatsäm. Jaduhñ hajxy xmiøødnijiootpáatäm. Y højts jaduhñ tøø xwyiinguexy coo højts ja'a miädia'agy jaduhñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajñähwáatsäm, y coo ja'a Dios hajxy jaduhñ xmiøødnijiootpaadäänäm.

20 Ja'a Dios højts tøø xwyiinguexy coo højts ja'a Jesucristo miädia'agy nyajwá'xät. Jaduhñ højts tøø xñäma'ay coo højts mijts nmänuu'xtá'agät coo miädia'agy hajxy mmäbøjcät. Jaduhñä Dios hajxy xyajñähwá'adsät. Jaduhñ hajxy ween xmiøødnijiootpaadøjät.

21 Cabä Jesucristo ja'a Dios mänaa miägädiehy. Pero coo Dios hajxy xjiaanč tehñ chójcäm, paady miänaañ coo ja'a Jesucristo ja'a nbojpä ngädieeyhajxy xchømø'cäm. Y coo ja'a Jesucristo hajxy xñähho'túutäm, jaduhñä Dios hajxy xyajñähwáatsäm. Jaduhñ hajxy xpiädáacäm hawa'adstuum.

6

1 Tøø ja'a Diosmiädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmio'oy. Højts mijts nmänuu'xtaacyy coo

ja'a Diosmädia'agy hajxy hoy mgudiúnät. Paady mijts jaduñ nmänuu'xta'agy, coo højts ja'a Dios nmøødtuñ.

² Hix, jaduñ jim myiñ cujaay maa ja'a Diosmädia'aguiän:

Tøøch nyajñhdijy mänáajøch miich ja'a hoyhajt ja'a weenhajt hawiinmats nmó'owät.

Cooch miich mänit xpia'yá'axät, mänitøch miich nmädówät. Mänit nbuhbédät. Mänit nya-jñähwa'ads nyajcuhwá'adsät,

nømä Diosmädia'agy miäna'añ. Hoorä, tøø yhabaatnä coo ja'a Dios hajxy nba'yáaxämd. Jaduñä Dios hajxy xyajñähwaats xyajcuhwáatsämd.

³ Maa højts ja'a Diostuung nduñän, hoy højts njäya'ayhaty. Hix, cab højts ndsocy coo højts pøn xñähwaambédät.

⁴ Hoy højts ja'a Diostuung njaanç tuñ. Nmee'xtujpy højts hoy tyiijä, hoy ñejpiä højts nja jaty nja habety. Hanaxiä højts tøø ndsaaçhpøcy. Tøø højts häyohn mayhooc nmänaxy nyajnaxy.

⁵ Tøø højts mayhooc nyajwobho'ogy. Tøø højts mayhooc nyajtsumy. Tøø højts ja'a cu'ug mayhooc xñäbädø'ogy. Tøø højts mayhooc nhanuu'xø'øy ja'a Diosmädia'agyquiøxpä. Tøø højts jamia'ay nhity mayhooc ja'a Diosmädia'agyquiøxpä. Tøø højts mayhooc jaguiay jayhu'ugy nhijpä.

⁶ Coo højts ja'a Diostuung nduñ, cab højts haxøøgwiiinmahñdy nnä'ägä møødá. Nwiinjuøøby højts ja'a Diosmädia'agy. Mee'xxieemy højts nhity, cab højts tii nmøjpäda'agy. Hojioot højts nmøød. Hix, ja'a Dioshespíritu højts nmøød.

Hamuumdu'joot hõjts jäya'ay jaduñ ndsocy nba'häyoy.

⁷ Nyajwa'xyp hõjts ja'a tøyhajt. Ja'a Diosmäjaa hõjts nmøød. Jaanč tehñ yhoy hõjts njäya'ayhaty nebiä Dios choquiän. Jaduñ hõjts ja'a haxøøgpä nga'a yajmäjäda'agy.

⁸ Näje'eyyä hõjts jäya'ay jaduñ xwyiin-gudsähgøøy. Näje'e hõjts xquia'a tso cy xquia'a mee'xy. Näje'e hõjts xquiumay, näje'e hõjts xñähojy. Tømiädiaacp hõjts, hoy hõjts jäya'ay näje'e xjia nänømy cooc tyijy hõjts nhøñda'agy.

⁹ Hoy hõjts ja'a tsaangu'ug xjia hixyhaty, cab hõjts häna'c näje'e xmiämøj xmiämayøøy. Mäjahñdiuum hõjts njaanč tehñ wiädity, hõxtä xyagho'ogaamb hõjts jäya'ay. Pero ja'a Dios hõjts jaduñ xcwieendhajt. Tøø hõjts ja'a Dios xyajcumädo y, pero cabä Dios jaduñ miäna'añ coo hõjts nhó'ogät.

¹⁰ Jootcuyc hõjts nnä'ägä hity homiänaajä, hoy hõjts wiingumänaajaty nja mänaxy nja yajnaxy. Hoy hõjts nja häyoy, nyajnahixøøby hõjts ja'a jäya'ay ja'a Diosmädia'agy nämay, jaduñä hoyhajt ja'a weenhajt hajxy piädät. Hoy hõjts tii nga'a ja møødä, Dios hõjts xmiooby tijaty hõjts nyajmaaji-ajpy.

¹¹ Mägu'ughajpädøjc, ja'a mijts jim hijpä Corintios, mijts jaduñ nmägaxyp. Tøø mijts ngøxy hawäänäm nebiaty hõjts ja'a mädia'agy nmøødä. Njaanč tehñ chojpy hõjts mijts jaduñ.

¹² Nja wi'i miøødnijootpaadäänäp hõjts mijts. Cab hõjts nnajuøøy pø jaduñ mijts xjiäwøøbiä.

¹³ Tunä mayhajt hajxy, tsøc hajxy nijootpáatäm.

Jaduhñ mijts nmägapxy nebiä huungän.

14 Cab hajxy mmøødwädiymúgät pøn ja'a Diosmädia'agy ca'a mäßøjp, coo hajxy jaduhñ mnä'ä pahíxpät neby hajxy yhaxøøgwäditiän. Hix, pønjaty ja'a Diosmädia'agy mäßøjp, hoy hajxy quiudiuñ. Hawa'adstuum hajxy je'e. Pero pønjaty ca'a mäßøjp, cab hajxy quiudiuñ. Wiing ja'a wyiinmahñdyhajxy. Haxøøgtuum hajxy je'ebä.

15 Hix, cabä Jesucristo tu'ugmädia'agy yhity møødä møjcu'ugong. Jaanä jäduhñduhmbä, pøn ja'a Diosmädia'agy mäßøjp, cab hajxy tu'ugmädia'agy yhiipä møød ja'a Diosmädia'agy hajxy ca'a mäßøjpä.

16 Cabä cuhdujt jaduhñ myiñ coo häna'c quepychech naaxpoch hajxy wyiingudsähgø'øwät maa ja'a Diostøjcän. Cabä quepychech naaxpoch jiujuquiä. Ja'a Diósäts mäßøcy jujcy. Y coo ja'a Diosmädia'agy hajxy nmäßøjcäm, jaduhñ mäwiin hajxy nmäßáatäm nebiä Diostøjcän, je'eguiøxpä coo ja'a Dioshespíritu hajxy nmøødhájtäm. Jaduhñä Dios jecy miänaañ:

Pønjátyhøchä nmädia'agy xmiøbójcäp,
je'echä nhEspíritu nmo'owaamby.
Nwoowhidáambiøch hajxy je'e.

Xwyiingudsähgø'øwáambøch hajxy je'e.
Ngu'ughadáambiøch hajxy je'e,
nømä Dios hajxy jecy xmiädiáacäm.

17 Jaduhñä Dios jecy miänaambä:

Puhwaatsnä hajxy ja'a häna'c ja'a quepychech
hajxy wiingudsähgøøbiä, ja'a häna'c ja'a
naaxpoch hajxy wiingudsähgøøbiä.

Cab hajxy mmøødwädiymúnät. Høxhix ja'a haxøøgpä hajxy. Mänítøch mijts xquiø'ødägøøñät.

18 XTieedyhadáambøch mijts hānajtīān.
Nnøøxhadáambiøch nmajc-hadáambiøch
mijts hānajtīān,
nømä Dios jecy miānaañ. Møccuhdujt ja'a Dios
miøød. Hoy piønä jaduhñ yhane'emy.

7

1 Mägu'ughajpädøjc, tøyhajt jaduhñ coo ja'a Dios hajxy xyhuunghájtām. Tsøcxä haxøøgwiinmahñdy hajxy najtshixøøyyām cøxiä. Yø'ø haxøøgwiinmahñdy, xyajmä'täp ja'a mni'x ja'a mjuøhñdy jaduhñ. Tsøgä Dios hajxy wiingudsähgøøyyām. Tsøgä njoot hajxy pädáacām maa ja'a Dioscøxpän.

2 Cham højts mijts nnämäaguumbä, tunä mayhajt hajxy, tsøc hajxy nijiootpäatām. Cab højts pøn tøø nhäyoowhixy, cab højts pøn haxøøgwiinmahñdy tøø nyajnähixø'øy, cab højts pøn tøø nwiinhøøñ.

3 Pero cábøch nmāna'añ coøch pøn tøø xñähøønø'øy. Njaanč tehñ chojpy højts mijts jaduhñ mäduhñtiä hajxy yaa njaac jugyhájtām hädaa yaabä naaxwiin. Jaduhñ mijts hijty tøø nhuuc nāmaabiä.

4 Nnajuøøbiøch coo mijts ca'xy mgudiuna'añ waambátyhøch mijts tøø nmägapy tøø nhane'emy. Ngumāabiøch mijts jaduhñ. Jootcújc-høch njaanč tehñ ñijiäwø'øyii maa mijtscøxpän. Jaanč tehñ xioondáacpøch, hoy højts madiu'u nja tsaächpøcy.

5 Coo hõjts ja'a hermano Tito jim nga'a paaty maa ja'a cajpt jaduhñ xiõhatiän Troas, paady hõjts jim nwiimbijty. Y coo hõjts yaa nmejch Macedonia-naaxooty, ni yaa hõjts ja'a hermano Tito nga'a paatpä. Coo hõjts yaa nga'a tsoj paaty, paady hõjts hijty jootcuyc nga'a nä'ägädä nijäwø'øyii. Xmiädsiphajp hõjts jäya'ayhajxy hijty ja'a Diosmädia'agyquiõxpä. Jootmayhajp hõjts hijty je'eguiõxpä cooc tyijy mijts jaduhñ mga'a mäbøga'añ.

6 Ja'a Dios, yagjootmøcpøjpy je'e pønjaty jaduhñ jootmayhajp. Y coo ja'a hermano Tito jiaanç mejch, mänit hõjts ja'a Dios xyagjootmøcpøjcy.

7 Xjiaanç tehñ yagjootmøcpøjc hõjts ja'a Dios jaduhñ coo hõjts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx hõjts xyhawaanä cóogøch mijts xjia wi'i jìøbhixy cooçh jim nnøcxät maa mijtsän. Jaduhñ hõjts tøø xyhawáanäbä cooc mijts mjootmayhaty je'eguiõxpä cooçh mijts hijty tøø xyhuuc yagjootmayhajpä. Y jaduhñ hõjts tøø xyhawáanäbä cóogøch mijts xjiaanç tehñ jiahmiejtsta'agy. Coo hõjts jaduhñ tøø xquiõxy hawaanä, páadyhøch njaanç tehñ xiooñda'agy.

8 Mänáajøch mijts ja'a nocy jawyiinhajtpä nya-jnäguexiän, nhójjøch mijts jaduhñ siémpräm. Paady hajxy weeñtiä mjootmayhajty. Jootmayhájtthøch høøçh wéeñtiäbä coo mijts nhojy.

9 Coo mijts nhojy, paadiä mhaxøøgcuhdujt hajxy mhøxhijxy. Xquiumaayy mijts ja'a Dios jaduhñ coo hajxy jaduhñ mhøxhijxy. Coo hajxy jaduhñ mhøxhijxy, páadyhøch nxooñda'agy, ca'a

jie'eguiøxpä coo hajxy mjootmayhajty.

¹⁰ Pønjaty yhaxøøgcuhdujt høxhijxp, je'edshajxy hodium mähmø'øwäp. Cumay hajxy jaduhñ piädsømäät maa ja'a Diosän. Y cab hajxy jaduhñ jiootmayhájnät. Pero pønjaty yhaxøøgcuhdujt ca'a høxhijxp, haxøøgtuum hajxy miähmø'øwät. Hoy miänaaxøø hajxy jaduhñ jiootmayhada'añ.

¹¹ Pero mijts, hamuumdu'joot hajxy mgudiuñ nebiaty mijts tøø nmägapxy tøø nhane'emiän mänájøch ja'a jayøbajtpä nocy nguexiän. Mjaanč høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduhñ coo hajxy hijty tøø mgädieey. Y mdsähgøøyy hajxy jaduhñ weeñtiä. Chopy ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän.

¹² Paady højts ja'a nocy jim nguejxy maa mi-jtsän, coo häna'c-hajxy haxøøg tøø ñidiuñii. Ca'a jie'eguiøxphajtiä højts yø'ø nocy nguejxy. Paady højts nguejxpä, chopy højts ja'a njoot hänäjty coo hajxy myajcähxø'øgät coo højts mijts xchocyñä. Xyhijxp højts ja'a Dios jaduhñ coo højts nga'a hønnda'agy.

¹³ Coo højts mijts jaduhñ xchocyñä, paady højts nxoonnda'agy.

¹⁴ Xoonndaacp højts jaduhmbä coo ja'a hermano Tito xioonndaacpä. Paady xioonnda'agy coo ja'a Diosmädia'agy hajxy hänäjty hoy mbanøcxyñä nägøxiä mänaa jim yhitiän maa mijtsän. Tøøchä hermano Tito hijty nnäma'ay coo mijts ja'a

Diosmädia'agy hoy mgudiuñ. Y tøyhajt hajxy mjaanč cudiuñ.

¹⁵ Hamuumdu'joot mijts ja'a hermano Tito xjiaanč tehṃ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän.

¹⁶ Nnajuøøbiøch coo mijts ja'a Diosmädia'agy hoy mbanøcxaanä; päadyhøch nxoonä'agy.

8

¹ Hoorä, mägu'ughajpädøjc, cham højts mijts nyajmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsänaabiä Macedonia-naaxooty.

² Jaanč tehṃ xioondaacp hajxy, hoy hajxy jaduhñ tøø jia tsaachpøcy hoyhoy, hoy hajxy jaduhñ jia häyoy hanaxiä. Coo hajxy jaduhñ jiaanč tehṃ xioonda'agy, paadiä xädø'øñ hajxy may tøø yajmucy. Hojiot hajxy jiaanč tehṃ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduhñ tøø yecy.

³ Hamuumdu'joot hajxy jaduhñ tøø yecy, ca'a yhadsipä, ca'a yhajootma'adä. Tøøch nhamdsoo hixy coo hojiot hajxy jaduhñ jiaanč tehṃ miøødä. Høxtä yejnajxypä xiädø'øñ hajxy jaduhñ näjootpä.

⁴ Coo hajxy miädoyhajty coo højts ja'a häyoobäjäya'ay hänajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit højts xnämaayy coogä xädø'øñ hajxy jaduhñ quiexaambä, ja'a hajxy jim tsänaabiä Macedonia. Hamuumdu'jóotäc hajxy jaduhñ quiexa'añ.

⁵ Xoon_udaac højts jaduh_n coo ja'a hermanodøjc xädø'øñ hajxy may yejcy, ja'a hajxy jim_n tsänaabiä Macedonia. Y coo hajxy miänaañ_n coo ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoon_udaacy. Dios jaduh_n mänaañ_n coo hajxy jaduh_n quiudiúnät. Jaduh_n hajxy miänaambä cooc højts ja'a nmädia'agy hajxy xquiudiunáañäbä.

⁶ Mänaa ja'a hermano Tito jim_n jayøbajt yhooyän maa mijtsän, mänit hajxy xñämaayy coo xädø'øñ hajxy myajmúgät. Hoorä, jim_n højts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim_n mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä.

⁷ Jaanč teh_m yhoy ja'a Diosmädia'agy hajxy mmäbøcy. Jaanč teh_m yhoy hajxy myajwiin-gapxø'øy. Jaanč teh_m yhoy hajxy mwiiinjuø'øy. Hamuumdu'joot hajxy jaduh_n mmäbøcy. Xji-aanč teh_m chojpy højts mijts. Hoorä, chojpy højts ja'a njoot coo mijts ja'a häyoobäjäya'ay mjaanč teh_m piuhbédät hamuumdu'joot xädø'øñhaam.

⁸ Cábøch mijts ndehm_n yhane'emy coo hajxy mbuhbédät. Paady mijts jaduh_n nyajmøødmädia'agy nebiatiä wiingiäya'ayhajxy tøø miäbuhbetiän, ween hajxy jaduh_n mbahíxpät. Jaduh_n hajxy myajcähxø'øgät coo hajxy tøyhajt mjaanč mädsojpä.

⁹ Tøyhajt jaduh_n coo ja'a Jesucristo hojiot jiaanč teh_m miøødá, ja'a nWiindsøn_nhajtäm_nhajxy. Cahnä hänäjty yaa quiäda'agyñä hädaa yaabä naaxwiin nebiä pajäya'ayän, jim_n hijty møc yhane'emy maa ja'a Tieedy ja'a wyiinduumän.

Pero coo yaa quiädaacy, mänit jaduñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduhñ hajxy hoy xñähho'túutäm. Y coo hajxy jaduñ tøø xñähho'túutäm, paady hajxy jim xyajnøcxáanäm maa ja'a Tieediä wyiinduumän, pønjataä miädia'agy jaduñ mabøjcäp.

¹⁰⁻¹² Cham mijts nwiingapx njøjcapxø'øwa'añ coo ja'a xädø'øñ hajxy myajpedøød neby hajxy hadojumøjt mwiiinmahñdyhajtiän coo hajxy hänajty myajmuga'añ. Mja nähmajts hajxy jaduñ, pero cahnä hajxy myajpedyii. Hahixøøby jaduñ coo hajxy myajpedøød, jaduñ hajxy myajcähxø'øgät coo hojiot hajxy tøyhajt mjaançh møødä. Mi-jts jaduñ mwiiinmahñdyhajtsohn coo xädø'øñ hajxy hänajty myajmuga'añ. Jaduhñ hajxy myégät neby hajxy mmäjäda'aga'añ. Mädøyyyä jaduñ. Cab jaduñ yhahixø'øy coo hajxy hanaxiä myégät. Hix, jaduñä Dios ja'a jiioot chocy coo hajxy myajcähxø'øgät coo hojiot hajxy jaduñ mjaançh møødä.

¹³ Cábøch nmäna'añ coo hajxy mhäyoodägø'øwät, páadyhøch tøø nmäna'añ coo hajxy hanaxiä mga'a yégät.

¹⁴ Jaduhñhøchä njoot chocy coo pøn tii quia'a yajmaajiädät. Jaduhñds je'e, hahixøøby jaduñ coo mijts ja'a häyoojäjäya'ay mbuhbédät, je'eguiøxpä coo mijts nä'ä tægø'øbä mmøødä jäda'ahaty. Y coo mijts hänajty tøø mhäyoodägø'øy, mänit mijts xpiuhbejtägätsät, pø jim hajxy hänajty miøødä nä'ä tægø'øbä.

¹⁵ Jaduhñ jim myiñ cujaay maa ja'a Diosmädia'aguiän: “Pønjata may yajpädø'c,

piuhmooyy hajxy je'e pøn̄jaty weeñtiä yajpädø'c. Yaghaguipxyjatiøøyy hajxy jaduñ tu'cuħdujt."

16 Dios ja'a hermano Tito jaduñ tøø yajnähdiy coo hojioot miøødhädät maa mijtscøxpä, neby højts hojioot nmøødän maa mijtscøxpän. Dioscuju'uyäp ja'a Dios jaduñ.

17 Coo højts ja'a hermano Tito nnämaayy coo jim ñøcxät maa mijtsän, jootcugøøyy je'e coo højts jaduñ nnämaayy coo jim ñøcxät. Hiç, hamdsoo-joot hijty jaduñ ñä'ägä nøcxa'añ.

18 Nyajmäguexø'øwaamby højts ja'a hermano Tito ja'a mägu'ughajpä wiingpä. Wiinduhmçhajtøjc tøø yajmädoxyhaty coo ja'a Diosmädia'agy hoy yajwa'xy ja'a Jesucristocøxpä.

19 Jaduñä mäbøjpädøjc-hajxy tøø miänaambä coo højts nmødhädät majaty højts ja'a xädø'øñ nyajmucy mänaa højts ja'a häyoobäjäya'ayhajxy hänajty nøcxy nmo'owa'añän. Cähxø'øgaamb jaduñ coo ja'a Dios miøjjä jiaançhä. Jaduñ quiähxø'øgaambä coo højts hojioot nmøødä.

20 Paady højts nämetsc nädägøøg nwädity xädø'øñyajmujpä, cab højts ndsocy coo højts pøn xñänømät cooc tyijy højts nje'ehada'añ. Hiç, majiaty højts xädø'øñ nyajmucy.

21 Chojpy højts ja'a njoot jaduñ coo højts ja'a jäya'ayhajxy xquiumáyät neby højts ja'a Dios xquiumáyän.

22 Chaads højts ja'a mägu'ughajpä mäwiingpä nguexáangumbä møødä hermano Titohajxy. Mayhooc højts hoy tøø xmiøødtuñ hoy ñä'a mädyii tuungä. Hamuumdu'joot jim ñøcxa'añ maa mi-

jtsän. Hix, ñajuøøby jaduñ coo mijts hoy myajtøjtägø'øwa'añ.

²³ Naxiä hermano Tito hajxy hoy mdehm yajtøjtägø'øwät coo hajxy jim miédsät. Haa ja'a hermano Tito, hoy miänájøch jaduñ xñä'ägä møødtuñ, páadyhøch jim nguexa'añ maa mijtsän. Y ja'a jiamiøødhajxy nämetspä, ja'a mæbøjpädøjc-hajxy yaabä, jaduñ hajxy tøø miänaambä coo hajxy jim ñøcxät. Hoyyá Jesucristo hajxy wyiingudsähgø'øy.

²⁴ Coo mijts ja'a hermano Tito hoy myajtøjtägø'øwät møødä jiamiøødhajxy, jaduñ mijts ja'a mæbøjpädøjc hajxy xyhíxät coo hajxy tøyhajt mjaanč mädsocy. Tøjiádäp jaduñ neby højts mijts tøø nmädia'aguiän coo mijts hojioot mjaanč tehñ miøødä.

9

¹ Høøch mijts jaduñ nnä'a jaac näjaayøøby. Nnajuøøbiøch jaduñ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mæbøjpä.

² Hix, nnajuøøbiøch coo hajxy hamuumdu'joot mbuhbeda'añ. Jadúhñhøchä mæbøjpädøjc-hajxy tøø nhawaanä, ja'a hajxy jim tsänaabiä Macedonia-naaxooty. Jadúhñhøch hajxy tøø nhawaanä coo mijts hadøjumøjt mdägøøyy xädø'øñyajmujpä, pønjataä Diosmädia'agy jim mæbøjp Acaya-naaxooty. Y coo mijts jayøjp mnähmajch, paadiä Macedóniabä jäya'ayhajxy nämay xpiahixaambä. Jaduñ hajxy hamuumdu'joot miäbuhbedaambä nej mijts mmæbuhbeda'añän hamuumdu'joot.

3 Páadyhøchä hermano Titohajxy jim̄ nguejxø'oga'añ maa mijtsän, weenä xädø'øñ hajxy paquiä myajmujpädø'øy. Jaduhnds je'e, cooch jim̄ nnøcxät, tøø ja'a xädø'øñ hajxy hänäjty mgøxy yajmujnä. Haa ca'a, tøøchä Macedoniabähajxy nhawaanä coo mijts ja'a xädø'øñ myajmuga'añä.

4 Hix, wéhndøchä Macedóniabä jäya'ayhajxy näje'e nmødhádät jim̄ maa mijtsän. Y coo hajxy jaduhñ xyhíxät coo ja'a xädø'øñ hajxy hänäjty mga'a cøxy yajmucyñä, mdsähdiunaamb hajxy jaduhñ. Jadúhñhøch ndsähdiúumbät je'eguiøxpä cooch mijts tøø nmädia'agy coo ja'a xädø'øñ hajxy hänäjty myajmuga'añ.

5 Páadyhøch jaduhñ nwiinmaayy coo hijty yhahixø'øy coochä hermano Titohajxy jawyiin nguejxø'øgät maa mijtsän, jaduhñ mijts jim̄ xpiuhbédät maa ja'a xädø'øñ hajxy myajmuquiän. Jaduhñä xädø'øñ hajxy myaghídät nähix hahixø'ø cooch jim̄ nmédsät, neby hajxy jaduhñ tøø mmäna'añän coo hajxy myaghida'añ. Jaduhñ hajxy myajcähxø'øgät coo ja'a xädø'øñ hajxy myega'añ hojiootcøxpä. Cab pøn jaduhñ miänä'anät cooc tyijy mijts hadsip tøø nhane'emy coo hajxy myégät.

6 Jaduhnds je'e, pønjaty jaduhñ wiinduc wiindsaach, cabä hoyhajt hajxy piaada'añ. Pero pønjatiä häyoobäjäya'ay näxuu'tsp, je'edsä hoyhajt hajxy jaduhñ paadaamb. Tøyhajt jaduhñ.

7 Jootcuyc hajxy myégät hamuumdu'joot neby hajxy hänäjty myega'añän, ca'a yhadsipä ca'a yha-jootma'adä, ca'a hajxy tii mnajtshäyowø'øy. Hix, je'e ja'a Dios chojpy pønjaty jaduhñ jootcuyc yejp.

⁸ Møj jaančhä Dios. Xmió'owäp mijts ja'a hoyhajt ja'a weenhajt møj may, jaduhñ hajxy tii mǵa'a yajmaajiádät ni mänaa. Nä'ä tägø'øbä hajxy jaduhñ xmió'owät, jaduhñä wiingjäya'ay hajxy hoy mbuhbejtägätsät hoy ñejpiä.

⁹ Jaduhñ jim myiñ cujaay maa ja'a Diosmädia'aguiän:

Pøn hojiäya'ay, møj mayyä häyoobäjäya'ay piuhbety.

Hoy miänaaxøø ja'a Dios jaduhñ piuhbejtägatsa'añ.

¹⁰ Ja'a Dios, yejpy je'e ja'a tøømd mädyii mní'ibäp, mädyii mdúnäp. Yajmayøøby jaduhñ nebiä mgáyät nebiä mhú'ugät. Jaanä jäduhñduhmbä, xmió'owäp mijts ja'a Dios nä'ä tägø'øbä tijaty hajxy hānajty myajmaajiajpy, jaduhñ mijts ja'a häyoobäjäya'ay mmoodiägätsät.

¹¹ Y coo mijts ja'a häyoobäjäya'ay jaduhñ hamuumdu'joot mbuhbédät, mänit mijts ja'a Dios ja'a hoyhajt ja'a weenhajt møj may xmió'owät. Y coo hōjts ja'a häyoobäjäya'ay xädø'øñ nøcxy nmo'oy, ja'a mijts hānajty tøø myéquiäbä, mänitä häyoobäjäya'ay ja'a Dios hajxy ñāma'awa'añ: “Dioscuju'uyäp.”

¹² Hix, coo mijts ja'a häyoobäjäya'ay jaduhñ mbuhbédät, mejtstu'u ja'a hoybä hajxy jaduhñ mduna'añ. Piaadaambiä häyoobäjäya'ayhajxy tijaty hajxy hānajty yajmaajiajpy, y tehngajnä ja'a Dios hajxy jaduhñ ñāma'awa'añ: “Dioscuju'uyäp.”

¹³ Coo mijts ja'a häyoobäjäya'ay jaduhñ mbuhbédät jootcuyc hoy miädyii cajptä, myajcähxø'øgaamby hajxy jaduhñ coo ja'a Dios ja'a miädia'agy hajxy mgudiuunä ja'a Jesucristocøxpä. Jaduhñä

häyoobäjäya'ay ja'a Dios hajxy møj jaančh ñäma'awa'añ, je'eguiøxpä coo mijts ja'a Dios ja'a miädia'agy mgudiuunä, møød coo hojioot hajxy mjaančh tehñ miøødä ja'a häyoobäjäya'aguiøxpähajxy.

¹⁴ Coo mijts ja'a Dios ja'a hoyhajt ja'a weenhajt møj may tøø xmio'oy, paady mijts ja'a häyoobäjäya'ay xchoga'añ xpia'häyowa'añ, møødä Dios hajxy pia'ya'axa'añ ja'a mijtsçøxpä.

¹⁵ Tsøcxä ja'a Dios hajxy nägøxiä nämáayyäm: “Dioscujú'uyäp”, je'eguiøxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túutäm. Møjmayhajt ja'a Dios jaduhñ tiuun hoy-yagjuøñä.

10

¹ Høøch mijts cham nmägapxaamby nhane'emaamby, høøch Pablohajpä. Mänaa ja'a Jesucristo yaa wiäditiän hädaa yaabä naaxwiin, jaančh tehñ miøødä hojioot hänajty. Mee'xxieemy hänajty jiaančh tehñ wiädity. Jadúhñhøch je'e nja pahixaañ cooçh mijts jaduhñ nmägapxa'añ nhane'ema'añ. Ja'a nmädsiphøchhajxy, jadúhñhøch hajxy xñänømy cooc tyijy mijts hänajty tsähgø'ø tsähgø'ø nmägapxy nhane'emy mänáajøch jimñ nhitiän maa mijtsän, pero cooc tyijy høøch nga'a tsähgøøñä coo mijts nmägapxy nhane'emy nocyaam. Cab jaduhñ tiøyyä, nä'ä hønñdaacp hajxy jaduhñ.

² Mägu'ughajpädøjc, huuc tunä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduhñ mhøxhixät, cab mijts jim waamb nnämá'awät cooçh jim nnøcxät maa mijtsän.

Pero pøn jaduhñ mänaamb cooc tyijy hõjts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'ech mäbøcy hajxy nhójäp hajäya'ayhaam. Nyajcähxø'øgäbøch jaduhñ cooçh hänajty tøyhajt nga'a tsähgø'øy.

³⁻⁴ Hoy hõjts yaa nja tsäna'ay hädaa yaabä naaxwiin, cab hõjts ja'a nhamdsoo wiinmahñdy nyajtuñ nebiä yaabä jäya'ayhajxy yajtuñän. Ja'a Dios hõjts xpuihbejp ja'a miäjaahaam, cab hõjts ja'a Dios ja'a miädsip jaduhñ nyajmäjädaacä.

⁵ Jii jäya'ayhajxy näje'e wiädity, yajcumayaamb hajxy, hõhndaacp hajxy. Cabä jioothajxy yajmädsocy coo wiinghäna'c ja'a Dios hajxy pia'häyówät. Nyajcähxø'py hõjts jaduhñ coo yø'ø häna'c-hajxy jaduhñ yhõhnda'agy. Y coo hõjts hänajty tøø nga'a yajmäjäda'agy, mänit hõjts nyajmäböga'añ ja'a Jesucristocøxpä, coo ja'a miädia'agy hajxy ween quiudiuunä.

⁶ Y coo mijts hänajty hoy tøø mgudiuñ, cab hõjts mijts hänajty waamb nnäma'awaannä. Pero pønjaty jaduhñ ca'a nä'ägädä cudiunaamb, je'eds hõjts hahoy nhøxquexaamby maa ja'a tsajtøjcän.

⁷ Pønjaty jaduhñ najuøøby coo hajxy tøø wyi-inguexyii ja'a Jesucristäm, ween hajxy ñajuøøbiä cooçh ja'a Jesucristo tøø xwyiinguejxpä. Tøyhajt jaduhñ. Hoy piønä jaduhñ ñajuø'øy.

⁸ Ja'a Jesucristo hõjts ja'a cuhdujt jaduhñ tøø xmio'oy coo hõjts mijts nmägäp x nhané'emät. Chojiä jioot jaduhñ coo mijts ja'a miädia'agy mjaac mäböjcät. Cabä jioot chocy coo hajxy mdudägóyyät. Tøyhajt jaduhñ cooçhä Jesucristo ja'a cuhdujt jaduhñbä tøø xmio'oy. Cooçh

jaduhñ nniñänømyii, cábøch ndsähdiuna'añ, hóyhøch häna'c jadhun xjia nänømy cóogøch tyijy nyajcumaya'añ hanaxiä.

⁹ Cábøch mijts nhadsähgø'øwa'añ, hoy mijts nocy naxy nja yajnäguexy.

¹⁰ Ja'a nmädsiphøchhajxy, jadhun hajxy miäna'añ cooc tyijy mijts møc nhane'emy nocyhaam. Pero jadhun hajxy miänaambä cooc tyijy hänajty møc nga'a hane'emy mänáagøch jim nhitiän maa mi-jtsän, cooc tyijy hänajty weenjaty ndsähgø'øy.

¹¹ Pero pønjaty jadhun mänaamb, cabä tøyhajt hajxy miøødä. Jadhun dsä tøyhajtpä, neby højts mijts møc nhane'emiän nocyhaam, jaanä jadhun mijts møc nhane'emaambä coo højts jim nnøcxtägätsät maa mijtsän.

¹² Jii häna'c-hajxy näje'e, jaanč tehñ yajcumayaamb hajxy cooc tyijy hajxy jiaanč tehñ jiaty jiaanč tehñ ñajuø'øy. Hamiñ haxøpy hajxy jadhun ñiguiumayii. Y cabä wiinghäna'c hajxy quiumay. Pero cabä tøyhajt hajxy miøødä. Højts, cab højts jadhun nhäna'c-haty. Cab højts jadhun niguiumayii.

¹³ Caj pues, cab højts nyajcumaya'añ. Jadhun højts nduna'añ neby højts ja'a Dios tøø xya-jnähdiijiän coo højts ndúnät. Jadhun højts tøø xya-jnähdiy coo højts jim ndúnät høxtä jimbaady maa mijtsän.

¹⁴ Coo højts jim nduñ maa mijtsän, ngudiumby højts jadhun neby højts ja'a Dios tøø xñäma'ayän. Hix, højts ja'a Diosmädia'agy jim nyajwa'xtsohn maa mijtsän, ja'a Jesucristocøxpä.

¹⁵ Majaty wiinghäna'c jadhun tøø tiuundsooñän,

cab hõjts jaduñ nmäna'añ coo hõjts jim tøø nduñ. Cab hõjts jaduñ nguhdujthaty. Pero chojpy hõjts ja'a njoot coo mijts ja'a Diosmädia'agy maas hoy mmäbõgät, jaduñ hõjts maas hoy njaac tehñ tiúnät maa mijtsän.

¹⁶ Y jaduñ hõjts ja'a Diosmädia'agy hoy nya-jwá'xät jäguembaady maa pøn ja'a Diosmädia'agy quia'a mädoynän. Hix, cab hõjts nduna'añ maa wiinghäna'c jaduñ tøø tiuundsoñän. Hix, cab hõjts jaduñ nyajcumaya'añ.

¹⁷ Jaduñ jim myiñ cujaay maa ja'a Diosmädia'aguiän: “Cab jaduñ yhahixø'øy coo hamdsoo mniguiumayøøjät. Pero jaduñ yhahixø'øy coo ja'a Dios hajxy mõj jaançh mnänómät.”

¹⁸ Je'eduhñ tsoobaatp coo ja'a Dios jaduñ xquiumáyät. Cab jaduñ choobaady coo hamdsoo mniguiumayøøjät.

11

¹ Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Cooch jaduñ weeñtiä nniguiumayii, jaduñ yajmädoyn nebiä cuhhiimbähajxy miädia'aguiän.

² Nej mijts ja'a Dios xchoquiän, jadúñhøch mijts ndsojpä, je'eguiøxpä cooch mijts ja'a Diosmädia'agy tøø nyajmábøcy ja'a Jesucristocøxpä. Chójpjøchä njoot jaduñ coo ja'a mjoot hajxy mbädá'agät hamuumdu'joot maa ja'a Jesucristocøxpän. Cabä mjoot hajxy wiingtuum mbädá'agät.

3 Mnigwieendähadóøjöp hajxy, jaduhñ hajxy pøn xquia'a jøjcapxó'øwät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhøhmbä. Cab mijts xyajmädsocy coo ja'a Jesucristo hajxy hamuumdu'joot mbanócxnät. Paquiä hajxy jaduhñ xwyiinhóønät. Haa ca'a, jaduhñä Eva jecy yhuuc wiinhøhnäbä ja'a møjcu'ugóngäm mänaa ja'a møjcu'ugong ñibiäda'agyijän nebiä tsahñdiän. Siémprämä møjcu'ugong quiuwiinmahñdiä. Paquiä ja'a Eva yajwiinhøhñ.

4 Paquiä mijts ja'a miädia'agyhajxy jaduhñ mmäbøjcø'cä pønjaty mijts jaduhñ wiing xyajnähihøøby ja'a Jesucristocøxpä. Cab hajxy jaduhñ yajnähihø'øy neby højts ja'a Diosmädia'agy nyajnähihø'øyän ja'a Jesucristocøxpä. Cab hajxy jaduhñ yajnähihø'øy ja'a Dioshespíritucøxpä neby højts nyajnähihø'øyän. Paquiä mijts ja'a miädia'agyhajxy jaduhñ mbadu'ubøjcä.

5 Yø'ø häna'c-hajxy jaduhñ wiing yajnähihøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexypän, neby jaanç tehñ jiajpän. Cab jaduhñ yhooyä coo hajxy mmáná'anät cooc tyijy hajxy miaas jaty queeç høøç njaty.

6 Wehñdäda'a jaduhñ tiøyyä cooç hoy yajxon nga'a xi'igy nga'a mädia'agy; cab jaduhñ ñejpiä. Pero tøyhajt jaduhñ cooç madiu'u njaty nna-juø'øy ja'a Diosmädia'agyquiøxpä. Homiänaajä højts mijts ja'a tøyhajt nmo'oy hoy ñä'ä tiiguiøxpä.

7 Mánáajøch mijts ja'a Diosmädia'agy nyajwiingapxø'øyän, cáboch mijts jaduhñ mänaa nnämaayy cooç mijts xmiäjúyät.

Niguiudúunäbøch hänajty hamdsoo, je'eguiøxpä cooçhä njoot hänajty chocy coo mijts ja'a Diosmädia'agy maas hoy mmäbøgät. Y cooçh hänajty hamdsoo nniguiudúunäxä, páadyhøçhä jäya'ayhajxy näje'e xñänømy cóogøch tyijy hänajty hoy nga'a cudiuñ. Pero cab jaduñ tiøyyä.

⁸ Wiingjäya'ayhøçh hajxy hänajty xpiuhbejp, ja'a Diosmädia'agy hajxy hänajty mäbøjpä wiingtuum-jaty. Páadyhøch hajxy hänajty xpiuhbety cooçh mijts ja'a Diosmädia'agy hänajty nyajwiingapx nya-jwiinmädiaagø'y.

⁹ Mänäajøch jim nhitiän maa mijtsän, cábøch hänajty pøn nnäma'ay cooçh hajxy xpiuhbédät xädø'øñhaam, hóyhøch hänajty tii nja yajmaajaty tähoocjaty. Hiç, xpiuhbéjpøçhä jäya'ayhajxy hänajty, ja'a Diosmädia'agy hajxy hänajty mäbøjpä, ja'a hajxy hänajty jim tsohmä Macedonia-naaxooty. Xmióobiøch hajxy hänajty tijátyhøch hänajty nyajmaajajpy. Y cábøch mijts mänaa nnäma'awa'añ cooçh mijts xpiuhbédät xädø'øñhaam.

¹⁰ Tømiädiáacpøch jaduñ nebiä Jesucristo tiømiädia'aguiän. Cáboçhä xädø'øñ pøn nmäyujwa'añ jim maa mijts mdsäna'ayän Acaya-naaxooty.

¹¹ Coo pøn jaduñ miäná'anät cóogøch tyijy mijts nga'a tsocy, høhndaacp hajxy jaduñ. Ja'a Dios jaduñ najuøøby cooçh mijts njaanç tehñ chocy njaanç tehñ pia'häyoy.

¹²⁻¹³ Jii häna'c-hajxy näje'e wiädity mäwiinhøhmä. Ja'a Jesucristäc tyijy hajxy tøø wyiinguexyii coo ja'a Diosmädia'agy hajxy yajwá'xät maa ja'a mäbøjpädøjc-hajxiän, neby

højts ja'a Jesucristo tøø xwyiinguexiän coo højts ja'a Diosmädia'agy nyajwá'xät. Pero hõhndaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduñ yhõhnda'agy coo hajxy yajcumaya'añ.

¹⁴⁻¹⁵ Yø'ø häna'c-hajxy, ja'a mõjcu'ugong hajxy wyiindsõñhajpy. Jaaya'ay hajxy jaduñ piahijxyp. Nnajuóøyyäm hajxy coo ja'a mõjcu'ugong ñibiäda'agyii nebiä jaanç tehñ yhojbän, nebiä Diosmoonsän. Hoorä, cab jaduñ yhoy-yagjuøøñä coo ja'a mõjcu'ugongä mioonsähajxy pïajacø'øy, coo hajxy yhõhnda'agy cooc tyijy hajxy tøø wyiinguexyii ja'a Jesucristäm. Y coo hajxy jaduñ haxøøg jiäya'ayhaty, je'e hajxy jaduñ quiümädowaamby.

¹⁶ Hoorä, chámhøch mijts nmägápxcombä. Cab hajxy jaduñ mmáná'anät cóogøch tyijy tøø nguhhiñ, hóyhøch weeñtiä nja niguiumayii. Pero, pø mjaanç mänaamb hajxy jaduñ cóogøch tyijy tøø nguhhiñ, huuc tunä mayhajt hajxy, høøchä nmädia'agy hajxy weeñtiä huuc hamädoowhítac. Nhuuc nimiädia'agyíjøch weeñtiä. Nhuuc niguiumayíjøch weeñtiä.

¹⁷ Cábøch nmäna'añ coochä Dios ja'a cuhdujt tøø xmio'oy cooch jaduñ nniguiumayóøjät. Jadúñhøch nniguiumayii nebiä cuhhiimbän.

¹⁸ Hix, ja'a jäya'ayhajxy nämaybä, miäniguiumáayyöp hajxy tijaty hajxy yaa miøød hädaa yaabä naaxwiin, møød tijaty hajxy jaduñ tøø tiuñ. Jaduñch høøchpä, wéeñtiøch chamñ nmäniguiumayáañäbä tijátyhøch tøø nduumbä.

¹⁹ Jaduñ mijts mjaanç tehñ ñibiäda'agyii

nebiä jaanč teh̄m̄ jiajpän nebiä jaanč teh̄m̄ ñajuøøbiän. Paady mijts ja'a cuhhiimbähäna'cä miädia'agyhajxy mhamädoowhidaanä. Pero cab hajxy tøyhajt mjaanč jaty mjaanč najuø'øy.

²⁰ Hix, mmee'xtujpy hajxy hoy ñä'ä tijatiä, hoy mijts yø'ø häna'c-hajxy hoy ñebiatia xjia häyoowhixy, yø'ø häna'c-hajxy hõhndaacpä, yø'ø miädia'agy hajxy mjaanč teh̄m̄ yhamädoowhidäänäbä. Xyhanehm̄b mijts jaduh̄n nebiä moonsän. Y xñägáayyap xñähúucap mijts ja'a mxädø'øñ. Xwyiinhõhm̄b mijts yø'ø häna'c. Xpiejxp mijts yø'ø häna'c. Høxtä xquiojxp mijts yø'ø häna'c, y cab hajxy waamb̄ mmäna'añ. Cab mijts yø'ø häna'c xyhixy nebiä jäya'ayän.

²¹ Pero højts, cab mijts jaduh̄n mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy hõhndaacpä. Cab højts jaduh̄n njootmøjjä.

Chámhøch weeñtiä nhuuc mädia'agáangumbä nebiä cuhhiimbän. Tijaty yø'ø häna'c-hajxy miäniguiumáayyap, nmøødhøchä cuhdujt høøchpä cooçh jaduh̄n nmäniguiumáayyäbät.

²² Niguiumáayyap hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tieedyhajty møødä Israel. Pues jaanä jaduh̄nč høøchpä, jaduh̄nč nniñänøømäbä cooçhä Abraham tøø nhaphajpä tøø ndeedyhajpä.

²³ Jaduh̄n hajxy ñiguiumáayyäbä je'eguiøxpä cooc tyijy hajxy mioonsähadyii ja'a Jesucristøm. Pues xmioonsähajpøchä Jesucristo høøchpä. Y maas hóyhøch nduñ que yø'ø häna'c-hajxy tiuñ. Cooçh jaduh̄n weeñtiä nniguiumayii, jaduh̄n yajmädoy nebiä cuhhiimbähajxy miädia'aguiän. Maas

móc-høch tøø nduñ que yø'ø häna'c-hajxy tøø tiuñ. Mayhóoc-høch tøø nyajtsumy tøø nyajmach. Ni pøn jaduhñ quia'a yajtsumy quia'a yajmachñä nébiøch tøø nyajtsumiän. Mayhóoc-høchä häna'c tøø xjiaançh tehñ wiobho'ogy. Mayhóoc-høchä häna'c ja'a weenjaty tøø xquia'a yagho'ogy.

²⁴ Mägooxc-hóoc-høchä judíoshajxy tøø xjiu'xy hii'xmajmocxmädaaxçø'ø.

²⁵ Tägøøghóoc-høchä häna'c tøø xwiopy paxyhaam. Tähóoc-høchä häna'c xjia ca'ch; xquiuhga'adsáambøch hajxy hänäjty. Tägøøghóoc-høchä barco tøø xmiäma'adø'øy mejjioty. Xjia møødnøøguguíinhøch jaduhñ. Mänäajøchä barco tähooc xmiägüiñän, tu'xøøch jiiy nhijty mejywyiing møød tu'tsuhñ.

²⁶ Mayhóoc-høchä yoñdiu'u tøø ndu'uyo'oy. Mayhóoc-høch ja weenjaty tøø nga'a nøøho'ogø'øy møjnøøgujc. Tøøchä mee'tspädøjc mayhooc nyohbiaady. Tøøchä nhamdsoo mägunaax mayhooc xjia yagho'oga'añ. Tøøchä wiinghäna'c xjia yagho'ogaambä; ca'a yhøøchä nmägunaaxhajxy je'e. Tøøch nwädity mäjähñdium jim cajptooty, møød jim pactuum, møød jim mejjioty. Tøøchä häna'c mayhooc xchaachtuñ, ja'a hajxy jaduhñ mänaambä cooc tyijy hajxy miäbøcy.

²⁷ Tøøchä tuung mayhooc xyaghanuu'xø'øy; høxtä xyajtsaächpøjc-høch jaduhñ. Mayhóoc-høch tøø ndsunaxy jamia'ay jayhity. Tøøchä yuu mayhooc nmänaxy nyajnaxy møødä tødsø'ø. Tøøch mayhooc nhity jaguiay jayhu'ugy. Tøøchä tøøchpä mayhooc nmänaxy nyajnaxy. Nja yajmaajiájpiøchä wit tucxy hänäjty.

28 Tøøch madiu'u ndsaačhpøcy, pero cáboch jaduhnajtä ngøxy mädia'aga'añ. Je'ečh nmädia'agaamby coočhä mabøjpädøjc jabom-jabom nnädajy nnämay wiinduhmčhajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity.

29 Pønä Diosmädia'agy hoy ca'a cudiunaamb, hoy hajxy jia mabøcy, nnäjootmayhájpjøch hajxy jaduhñ. Pøn jaduhñ cädiehby je'eguiøxpä coo tøø wyiinhøøñii, nmäjootma'adhájpjøchä häna'c ja'a tøø miäwiinhøøñbä.

30 Høøch, cáboch nyajcumaya'añ. Pero coočh häxøpy nyajcumaya'añ, je'ečh häxøpy nyajniguiu-mayáañp coočhä häyohn mayhooc tøø nmänaxy tøø nyajnaxy.

31 Ja'a Diøshøch jaduhñ xñajuøøby coočh nga'a høhnda'agy. Ja'a Jesucristo ja'a Tieedy je'e. Tsøgä Dios hajxy cøjxta'axiøø wiingudsähgøøyyäm. Ja'a Jesucristo hajxy nWiindsønhtëm.

32 Mänaa ja'a Aretas hänajty tiuñän gobiernä, mänitøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hänajty jaduhñ. Jia pädaac ja'a hadänaabiä hajxy majatiä tägø'øwøødiaact nébiøch jaduhñ nga'a pädsømat.

33 Pero päyø'c-høch. Ja'a nmägu'ughajpøchhajxy hoy xquihdøøñaxy cachjooty maa ja'a muuch hänajty jjutän.

12

1 Cab jaduhñ yhäxø'øy coočh nyajcumáyät. Pero nébiøch cham nmädia'aga'añän, jaduhñ yajmadowa'añ nébiøch nyajcumaya'añän. Je'ečh

cham nmädia'agaamby nebiátyhøchä Jesucristo hijxtahnd tøø xyajwiinhixiän.

²⁻³ Nmøødhjipiøchä Jesucristo tu'ugmädia'agy. Tøø yhijnä majmactsjumøjt coochä Dios jim tøø xyaghoy tsajpootyp maa ja'a wyiinduumän. Cábøch nnajuø'øy pø ni'xhaam pø copc-háamhøch jim nuooyy, o pø juøhñdyhaam. Ja'a Dios jaduhñ nidiuhñ najuøøby.

⁴ Madiú'ujøchä hoy-yagjuøøñäjatypä jim nmädooyy tsajpootyp. Cábøchä cuhdujt nmøødá cooch nmädiaactägätsät.

⁵ Coo wiinghäna'c häxøpy jim tøø yhoy tsajpootyp, mänitøch häxøpy nmøjpäda'aga'añ. Pero høøch, cábøch hamdsoo nniguiumaya'añii. Jagóoyyøch nmädia'aga'añ nebiátyhøchä häyohn tøø nmänaxy tøø nyajnaxy.

⁶ Nmøødhøchä cuhdujt jaduhñ cooch nmädiá'agät nebiátyhøchä Dios tøø nmøøduñ. Hix, tøyhájthøchä Dios jaduhñ tøø nmøøduñ. Cábøch nmädia'aga'añ cooch jim nuooyy tsajpootyp, je'eguiøxpä coochä njoot quia'a tsooy cooch pøn xmiøjpädá'agät. Coochä jäya'ayhajxy xyhixät cooch hoy njäya'ayhaty, cooch hajxy xmiädówät cooch hoy ngapxy nmädia'agy, mänitøch hajxy xquiumáyät.

⁷ Jaanç tehñ yhoy-yagjuøøñäjätyhøch jim nwi-inhijxy tsajpootyp. Pero cabä Dios ja'a jioot chocy cooch nniguiumayøøjät. Paadiä Dios miänaañ coochä møjcu'ugong ja'a tsaachpä xyajpáadät, jadúhñhøch hamdsoo nga'a niguiumayøøjät.

⁸ Tägøøghóoc-høchä Jesucristo nja mänuu'xtaacy cooch cu xyajnähwaach.

9 Mänítøch xyhadsooy: “Njaanč tehṃ chojpy njaanč tehṃ pia'häyóobiøch miičh. Páadyhøch miičhä mdsaačpä nga'a yajnähwa'adsa'añ, nyajcähxø'øgáambiøch jaduhṇ coo miičh mduñ ja'a høøchä nmäjaagøxpä”, nómhøchä Jesucristo xñämaayy. Xoondáacpøch jaduhṇ coochä ndsaačpä xquia'a yajnähwa'adsaannä, je'eguiøxpä cooch tøø xñäma'ay cóogøch xyajtuna'añ ja'a miäjaagøxpä.

10 Xoondáacpøch jaduhṇ coochä Jesucristo xyajtuñ, hóyhøchä tsaachpä nja paady madiu'u. Náxyhøchä häna'c xyhäyoowhixy. Náxyhøch cøxiä wiinä nyajmaajiaty. Náxyhøchä häna'c xchaačhtiuñ ja'a Diosmädia'agyquiøxpä. Náxyhøchä häyohn nmänaxy nyajnaxy. Pero cábøch nnä'ägä møjpada'agy cooch jaduhṇ njaty nhabety. Hix, cooch jaduhṇ njaty nhabety, cähxø'p jaduhṇ cooch tii nga'a tuñ ja'a nhamdsoo mäjaaháamhøch; ja'a Jesucristo miäjaaháamhøch jaduhṇ nduñ.

11 Hoorä, hóyhøch tii nga'a ja jada'añ hamdsoo, nmaas jájpiøch høøch quejee yø'ø häna'c-hajxy, yø'ø hajxy jaduhṇ niñänóømäbä cooc tyijy hajxy Dyioswiinguexiä. Cábac tyijy pøn jaduhṇ jiaty nébiäc hajxy jiatiän. Y cooch yø'ø häna'c-hajxy jaduhṇ tøø xñähwaambety, tiich mijts jaduhṇ coo tøø xquia'a nähgapxtu'udy. Cooch mijts tøø xquia'a nähgapxtu'udy, páadyhøch cham hamdsoo nniñähgapxtu'udyii. Jaduhṇ weenjaty yajmädoy nebiä yajcumayaambän.

12 Mänáajøch jim nhitiän maa mijtsän, mäníthøchä hijxtahnd madiu'u nyajcähxø'cy

hoy-yagjuøñäjatypä. Ja'a Diosmäjaaháamhøch jaduñ nyajcähxø'cy. Nyajcähxø'c-høch jaduñ coochä Dios jaduñ tøyhajt tøø xwyiinguexy. Mee'xtújpøch hänajty.

13 Jaanč tehñ yhóyhøch nduñ hoy miädyii tsajtøgootiä. Jaanä jadúhñhøch jim hoy nduumbä maa mijtsä mdsajtøjcän. Pero je'e mijtsä mga'a hojiäwøøby cooch mijtsä xädø'øñ tøø nga'a mäyujwa'añ nébiøch wiingtuumjaty nyujwa'añän. Jaanč tehñ wyiingä wiinmahñdy hajxy mmøødä. Pø tøøch mijtsä nyagjootma'ady, høøch hajxy huuc méé'xäc.

14 Metsc-hóoc-høch jim tøø nhooñä maa mijtsän. Miädägøøghóocpøch chamñ nnøcxáangumbä. Cábøch mijtsä tii nmäyujwa'ana'añ. Cábøchä njoot chocy coo hajxy tii xmió'owät. Jaduñ mijtsä ndsocy nebiä hamdsoo huungpäñ, paady mijtsä jaduñ nbuhbeda'añ. Pero cábøch nmäna'añ cooch mijtsä xpiuhbejtägätsät xädø'øñhaam.

15 Tøøchä njoot hamuumdu'joot nbäda'agy maa mijtsän coo mijtsä nbuhbédät hoy ñejpiä, hóyhøch cøxypänejpiä cu nja jat cu nja habet maa mi-tscøxpän. Njaanč tehñ chojpy mijtsä jaduñ; pätiidä mijtsä jaduñ coo xquia'a tsojtägach.

16 Mänáajøch jim nhoyyän maa mijtsän, cab mijtsä xädø'øñ nmäyujwaañ. Mnajuøøby hajxy jaduñ, tuhñds. Pero näje'e mijtsä jaduñ mmäna'añ cóogøch tyijy mijtsä tøø nwiinhøøñ

17 mänáajøchä nmägu'ughajpähajxy jim nguexiän maa mijtsän xädø'øñyajmujpä. Jadúhñägätsä tyijy mijtsä tøø nmämeech. Pero cab jaduñ tiøyyä.

18 Mänáajøçhä hermano Titohajxy jim̄ nguexiän maa mijtsän møødä mägu'ughajpä tu'ugpä, ni je'e mijts xquia'a mäme'e'tspä. Hix, jaduñä hermano Tito howyiinmahñdy hajxy miøødäbä nébiøch nmøødän. Hoguiuhdujt hajxy miøødäbä nébiøch nmøødän.

19 Jaduhñ mijtsäda'a mmäna'añhaty cooc ty-ijy højts nja wi'i ñiñähgapxtu'uda'añii maa mi-jtscøxpän. Pero cab jaduhñ tiøyyä. Ja'a Dios højts xyhijxp coo højts ja'a Jesucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduhñ nyajwiingapxø'øy, chojpy højtsä njoot jaduhñ coo mijts hamuumdu'joot mjaac mæbøgät.

20 Cooçh jim̄ nnøcxtägátsät maa mijtsän, mänitøch jootcujc nhidät pø hoy hajxy hånajty mwädity. Jaduhñ hajxy jootcujc mhíjpät ja'a høøchcøxpä. Pero pø cab hajxy hånajty hoy mwädity, jootmayhádäbøch jaduhñ. Jaanä jaduhñ mijts mjootmayhájpät. Je'eçh jaduhñ cham̄ nnädaj nnämaaby. Je'eçh jaduhñ nnänøømby ja'a ca'a howiädit, pø mnimiädsibøøyyäp hajxy hånajty, pø cab hajxy hånajty myajniyajmädsogyii, pø mnimiäjootmä'täp hajxy hånajty, pø mnimiädsiphájtäp hajxy hånajty, pø mniwyiingapxpéjtäp hajxy hånajty, pø mniñänøømäp hajxy hånajty cøxypä waamb, pø mniguiumäayyäp hajxy hånajty, pø mdsipyagjáltäp hajxy hånajty.

21 Pø jaduhñ hajxy hånajty mjaançh jootcø'øy cooçh jim̄ nnøcxtägátsät maa mijtsän, wéhñdøçhä Dios weenjaty xyajtsähdiúnät maa mijtsøxpän. Je'eçh cham̄ nnädaj nnämaaby.

Nnäjootmayhádábøch hajxy je'e, pønjatiä yhaxøøgcuhdujt hajxy hänäjty tøø quia'a najtshixø'øy. Je'ečh jaduħn nnänøømby coo wiingto'oxiøjc hajxy piawädity tehngajnä.

13

¹ Miädägøøghóocpøch jim̄ nnøcxa'añ maa mi-jtsän. Jaduhñä cuhdujt myiñ, coo hajxy hänäjty pøn̄ mnäxø'øwø'øwa'añ, tsipcøxpä testigo hajxy myajcähxø'øgät mejtstägøøg.

² Mänäajøch jim̄ nhuug hoobiän maa mijtsän ja'a miämetsc-hoocpä, mänitøch hajxy nyajcuhojøøyy coo hajxy haxøøg quia'a jootcøñät, pøn̄jaty hänäjty haxøøgwädijp. Y chámhøch mijts jadähooc nnäma'awáangumbä nägøxiä coo hajxy mga'a haxøøgwädítät. Y pø je'enä hajxy hänäjty mhaxøøgwädity cooçh jim̄ nnøcxtägátsät maa mijtsän, tsipcøxpøch mijts nøcxy nyajcumädowa'añ.

³ Jadúhñhøch nyajcähxø'øga'añ cooçhä Jesucristo miädia'agy tøyhajt nyajnaxjä. Haa ca'a, jadúhñhøch mijts tøø xyhuuc nämaabiä cooçh jaduħn nyajcähxø'øgät. Hix, møcmäjaahaamá Jesucristo hajxy xyajcumädówät coo hajxy hoy mga'a wädítät.

⁴ Coo ja'a Jesucristo miøjpahbejtä cruzcøxp, cabä miøcmäjaa hänäjty yajcähxø'øgy. Pero coo jiuypiojtägajch, coo jim̄ ñøcxtägajch maa ja'a Tieediän, jim̄äts jaduħn yhijnä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduħn højts mäjaa nga'a móødäbä hamdsoo. Pero coo højtsä Jesucristo nmøødhity tu'ugmädia'agy, paady

højts mijts hoy nhane'ema'añ ja'a Dios ja'a miøcmäjaahaam.

⁵ Huuc niñajuø'øwøø hajxy hamdsoo. Coø ja'a Jesucristo ja'a miädia'agy hajxy hoy mbanócxät, jaduhñ hajxy myajnajuø'øwät coø ja'a Jesucristo hajxy tøyhajt mjaançh møødhity tu'ugmädia'agy. Pero coø hajxy hoy mga'a panócxät, cabä Jesucristo hajxy tøyhajt mmøødhídät tu'ugmädia'agy.

⁶ Choippy højtsä njoot coø hajxy mnajuø'øwät coø højtsä Jesucristo tøyhajt nmøødhity tu'ugmädia'agy. Cab højts jaduhñ nhøhnda'agy.

⁷ Nmänuu'xtaacypy højtsä Dios coø hajxy hoy mwädítät, coø hajxy haxøøg mga'a jäya'ayhädät. Pø mwädijp hajxy hänajty hoy coø højts jim nnøcxtägátsät maa mijtsän, cab højts hänajty nyajcähxø'øga'añ coø højtsä Jesucristo ja'a cuhdujt tøø xmio'oy coø højts mijts nyajcumädówät. Y coø højts jaduhñ nga'a yajcähxø'øgät coø højtsä Jesucristo ja'a cuhdujt jaduhñ tøø xmio'oy, cab jaduhñ ñejpiä. Je'e højtsä njoot choippy coø hajxy hoy mwädítät.

⁸ Pø mjaançh wädijp hajxy hänajty hoy coø højts jim nnócxät, cab højts mijts hänajty waamb nnäma'awa'añ. Choippy højtsä njoot coø hajxy tøyhajt hoy mwädítät. Pero pø cab hajxy hänajty tøyhajt hoy mwädity, mänit højts mijts mäbøcy nhoja'añ.

⁹ Coø hajxy hoy mwädítät, xoondá'agäp højts jaduhñ. Cab højts jaduhñ nyajcähxø'øgät coø højtsä Jesucristo ja'a cuhdujt hänajty tøø xmio'oy coø højts mijts jaduhñ nyajcumädówät. Nmänuu'xtaacypy højtsä Dios jaduhñ coø ja'a

mhaxøøgcuhdujt hajxy mgøxy najtshixø'øwät, coo ja'a hoguiuhdujt hajxy hamuumdu'joot mjaac panøcxät tehngajnä.

¹⁰ Páadyhøch mijts cham weenjaty nhojy nocyhaam, jadúhnhøchä njoot chocy coo hajxy hoy mwädítät. Ja'a Jesucrístøchä cuhdujt jaduñ tøø xmio'oy maa mijtscøxpän, weenä miädia'agy hajxy maas hoy mjaac mæbøjcä. Cabä Jesucristo joot chocy coo hajxy mdudägóyyät. Y pø mjaançh wädijp hajxy hänäjty hoy cooçh jim nnøcxtägátsät maa mijtsän, cábøch mijts hänäjty waamb nnäma'awa'añ. Pø caj, mänit højts mijts mæbøcy nyajcumädówät.

¹¹ Hoorä, mägu'ughajpädøjc, chámhøch jaduñ nyajmayaanä maa hajxy cham nmägapxy nhane'emiän. Huuc cudiún hajxy jaduñ nébiøch cham nnäma'ayän. Yaghoyø'øw ja'a mdu'u hajxy. Ca'a haxøøgtu'u hajxy mbanøcxnä. Tsøc hajxy jaduñ nimiøødhíjtäm tu'ugmädia'agy. Cab hajxy tii myajtsip myajma'adøøñät. Jaduñä Dios hajxy xmiøødhíjnät. Xchójcäm ja'a Dios hajxy. Chojpiä joot jaduñ coo hajxy jootcuje nhíjtämät.

¹² Mniyajpoo'xøøjäp hajxy hamuumdu'joot, ween jaduñ quiähxø'øgy coo ja'a Diosmädia'agy hajxy mmæbøcy.

¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mæbøjpa.

¹⁴ Weenä Jesucristo hajxy nägøxiä xmio'oy ja'a hoyhajt ja'a weenhajt. Je'e hajxy nWiindsøn hájtäm. Weenä Dios hajxy xchójcäm homiänaajä. Weenä Dioshespíritu hajxy xmiøødhíjtäm nägøxiä. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

4e564219-157f-5807-b810-47a15308b8b8